

## **Incumbensa Locher Benguerel concernent l'organisaziun da la psichiatria d'uffants e da giuvenils dal Grischun**

En la sessiun d'avust 2017 dal cussegl grond è vegnida discutada en il rom da la revisiun totala da la lescha per promover la tgira da persunas malsaunas la dumonda, sch'ils servetschs psichiatrics dal Grischun (SPGR) duain furnir "en moda subsidiara" u da princip servetschs da la psichiatria d'uffants e da giuvenils.

Il cussegl grond è sa decidì da stritgar il pled "subsidiar" en l'art. 3 al. 1 da la lescha davart ils servetschs psichiatrics dal Grischun. Uschia pon ils SPGR metter a disposiziun da nov la medema purschida sco la psichiatria d'uffants e da giuvenils dal Grischun (PUG).

Tant la soluziun subsidiara da fin ussa sco er la nova soluziun cun dus purschiders (PUG resp. SPGR) u er in piazzament extrachantunal dals uffants e dals giuvenils n'èn betg optimala. Il scenari il mender pussaivel è ina concorrenza per uffants e giuvenils che han ils basegns correspondent. Quai maina a structurazions parallelas, è ineffizient e vul dir la finala che betg ils basegns dals uffants e dals giuvenils pertutgads e lur provediment il meglier pussaivel cun servetschs da la psichiatria d'uffants e da giuvenils na stattan en il center.

Il fanadur 2014 ha dunna prof. dr. Susanne Walitza fatg in'expertisa per incumbensa da la regenza grischuna. En quella vegnan mussads ils scenari pussaivels e las soluziuns ch'èn raschunavlas per la psichiatria d'uffants e da giuvenils dal Grischun sco er lur avantatgs e dischavantatgs.

Las sutsegnadras ed ils sutsegnaders incumbenseschan perquai la regenza da reglar da nov – resguardond las recumandaziuns da l'expertisa Susanne Walitza – l'organisaziun da la psichiatria d'uffants e da giuvenils dal Grischun cun l'intent da proveder il meglier pussaivel ils pertutgads. L'autonomia per il sector da la psichiatria d'uffants e da giuvenils ed il dretg dals uffants e dals giuvenils da survegnir in tractament ch'è adattà per lur vegliadetgna e ch'è professiunal (cun ina clera separaziun dals creschids e dals giuvenils e.a.p) ston esser garantids. I ston vegnir tratgas a niz sinergias pussaivlas en il sector organisatoric ed administrativ, ma i sto vegnir mantegnida ina direcziun operativa independenta da vart dals medis, da la tgira e da la pedagogia. Er ston vegnir scleridas e regladas correspondentamain las dumondas dal program necessari da las localitads e da las basas legalas necessarias davart ils custs da gestiun e d'investiziun.

Cuira, il 1. da settember 2017

**Locher Benguerel**, Marti, Zanetti, Atanes, Baselgia-Brunner, Bucher-Brini, Cahenzli-Philipp, Casty, Casutt-Derungs, Cavegn, Caviezel (Cuira), Clalüna, Danuser, Darms-Landolt, Deplazes, Dermont, Gartmann-Albin, Hitz-Rusch, Jaag, Kunfermann, Märchy-Caduff, Monigatti, Niggli-Mathis (Grüsch), Noi-Togni, Papa, Perl, Peyer, Pfenninger, Pult, Thöny, von Ballmoos, Widmer-Spreiter, Föhn, Geisseler